

**Saya masih bersama Umno, kata Muhyiddin selepas digantung
Malaysian Insider
March 1, 2016
Oleh Md Izwan**

Tan Sri Muhyiddin Yassin mengatakan masih bersama Umno setakat ini walaupun selepas penyingkirannya sebagai timbalan presiden parti itu Jumaat lepas yang diputuskan Majlis Tertinggi (MT).

Muhyiddin berkata, keputusan yang dibuat MT tidak menyentuh keahlian beliau sebagai ahli Umno yang masih sah sehingga hari ini.

"Sementara itu saya masih berada di dalam Umno dan saya ucap terima kasih kepada sahabat-sahabat yang datang memberi sokongan kepada saya," kata Muhyiddin ringkas sejurus tiba dari luar negara di Lapangan Antarabangsa Kuala Lumpur (KLIA) kepada pemberita hari ini.

Muhyiddin disambut kira-kira 100 penyokongnya yang datang dari Pagoh dan beberapa pemimpin kumpulan penentang Gabungan Ketua Cawangan Malaysia (GKCM) juga turut hadir bersama.

Para penyokongnya melaungkan sorakan "Hidup Tan Sri" sejurus beliau tiba di ruang ketibaan.

Mengenai perkembangan politik semasa, Muhyiddin berkata akan menjelaskan segalanya pada satu sidang media 2 hari lagi.

"Saya akan adakan sidang media 2 hari lagi di mana saya akan jelaskan semua perkara yang berkaitan dengan penggantungan saya dan kedudukan saya di dalam Umno dan hal-hal yang lain yang perlu saya jelaskan," katanya.

Muhyiddin pada Jumaat lalu disingkirkan daripada jawatan timbalan presiden atas alasan tidak melaksanakan tugas membantu Presiden Umno Datuk Seri Najib Razak kerana kritikan berterusannya berhubung skandal 1Malaysia Development Berhad (1MDB) dan wang derma RM2.6 bilion yang dimasukkan ke akaun peribadinya.

Muhyiddin juga mendakwa bekas peguam negara Tan Sri Abdul Gani Patail dan Gabenor Bank Negara Tan Sri Zeti Akhtar Aziz memberi taklimat kepadanya mengenai salahlaku 1MDB dan wang RM2.6 bilion.

Pendedahan itu menimbulkan kemelut pada ketika Najib terpalit dengan skandal kewangan terbesar dalam sejarah negara.- 1 Mac, 2016.

Copyright © 2015 Edge Insider Sdn Bhd

Source:

<http://www.themalaysianoutsider.com/bahasa/article/saya-masih-bersama-umno-kata-muhyiddin-selepas-penyingkiran>